



Datë: 03.03.2025
Numër Protokolli: 1526/2025

A.nr.96/2025

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendosjen e Ankesave në përbërje nga: Malsore Gashi-Bajraktari, kryetare, Eshref Shabani dhe Ardita Haxhnikaj-Demi, anëtar, me Atdhe Gashi, në cilësinë e procesmbajtësit, ka shqyrtuar ankesën me numër A.nr.96/2025, të datës 15.01.2025, të parashtruar nga ankuesja M.G-XH, kundër organit të punësimit: Ministria e Financave, Punës dhe Transfereve, në çështjen juridike “Kontestim konkursi”, duke vepruar në pajtim me nenin 6, paragrafin 1, nën paragrafin 1.1, nenin 16, paragrafi 3 dhe nenin 18, paragrafin 1, nën paragrafin 1.2 të Ligjit Nr.06/-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180 si dhe në mbështetje me dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me 03.03.2025, mori këtë:

V E N D I M

I. Aprovohet si e bazuar ankesa me numër A.nr.96/2025, e datës 15.01.2025, e parashtruar nga ankuesja M.G-XH, ashtu që, anulohet çdo veprim tjetër administrativ i ndërmarr në fazën e verifikimit paraprak dhe vlerësimit profesional, ndërsa, procedurat e pranimit kthehen në fazën e verifikimit të aplikacioneve.

II. Obligohet Udhëheqësja e Divizionit të Burimeve Njerëzore në Ministrinë e Financave, Punës dhe Transfereve, që brenda afatit prej 15 ditësh nga dita e pranimit të këtij vendimi të ndërmarr të gjitha veprimet e nevojshme administrative për zbatimin e këtij vendimi, siç përcaktohet në pikën I të dispozitivit.

III. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Kandidatja për pranim në shërbim civil, M.G-XH (tutje referuar: Ankuesja), me datë 15.01.2025 ka parashtruar ankesë me numër protokolli 175, të regjistruar nën shenjën A.nr.96/2025, në Këshillin e Pavarur Mbikëqyrës për Shërbimin Civil të Kosovës, kundër Konkursit me numër Reference RN00015582, të shpallur më datë 23.10.2024, nga Ministria e Financave, Punës dhe Transfereve, për pozitën “Zyrtar Pensional për Kategoritë e Luftës”.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar: Këshilli) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datë 30.01.2025 ka proceduar kërkesën për përgjigje në ankesë tek Ministria e Financave, Punës dhe Transfereve, ndërsa kjo e fundit më datë 14.02.2025, ka përcjellë përgjigjen në ankesë së bashku me shkresat e bashkangjitura të lëndës.

Kolegji për Shqyrtimin dhe Vendosjen e Ankesave, ka administruar këto prova: Ankesën me numër protokoli 175/2025 të datës 15.01.2025, të parashtruar nga ankuesja në Këshillin e Pavarur Mbikëqyrës për Shërbimin Civil të Kosovës; Konkursin me numër reference RN00015582 të datës 23.10.2024; Njoftimin e datës 19.12.2024; Dokument identifikimi; Lista e pagave për të punësuarit me numër e datës 01.08.2024; Vërtetimin Nr.Ref.1469/24 të datës 29.07.2024; Referencën e datës 06.01.2023; Vërtetimin nga “SecureIT”; Vetë deklaratën e datës 17.07.2024; Kërkesën për përgjigje në ankesë të Këshillit; Përgjigjen në ankesë nga MFPT; Dëshmi e aplikimit; Vendimin me numër protokoli 3464 të datës 17.12.2024; Akt emërimit me numër protokoli 935/2024 të datës 04.05.2024; Akt emërimit me numër protokoli 1059/2024 të datës 04.05.2024; Akt emërimit me numër protokoli 2368/2024 të datës 17.09.2024; Akt emërimit me numër protokoli 3584/2024 të datës 24.12.2024; Testin me shkrim të kandidatit M.H; Listën e kandidatëve të aprovuar dhe kandidatëve të refuzuar; Lista përfundimtare e vlerësimit të kandidatëve; Njoftimin e datës 19.12.2024; Njoftimin për kandidatin fitues të datës 30.12.2024; Njoftimin e datës 19.12.2024; Aplikacionin e ankueses së bashku me dokumentacionin e dorëzuar; Aplikacionin e kandidatit fitues së bashku me dokumentacionin e dorëzuar; Formularin për vlersimin intervistës me gojë të kandidatit M.H.

Kolegji për Shqyrtimin dhe Vendosjen e Ankesave, ka shqyrtuar të gjitha shkresat e bashkangjitura në lëndë, të dërguara nga ankuesja dhe organi i punësimit, dhe ka konstatuar se ankesa e ankueses është e bazuar, sepse:

Nga administrimi i shkresave të lëndës, rrjedhë se Ministria e Financave, Punës dhe transferove më datën 14.02.2024 ka shpallur Konkursin me numër reference RN000015582, me emrin e grupit të Administrimit të Përgjithshëm, gjegjësisht për pozitën e punës “Zyrtar Pensional për Kategoritë e Luftës” pranë Departamentit të Pensioneve, me afat aplikimi nga data 24.10.2024 deri më datë 22.11.2024.

Rrjedhimisht, nga shkresat e lëndës rezulton se në këtë konkurs kanë aplikuar gjithsejtë 102 njëzet e kandidatë, ku prej tyre 62 kandidatë janë përfshirë në listën e ngushtë, si kandidatë që kanë plotësuar kriteret për pozitën e shpallur, ndërsa sipas Njoftimit të datës 19.12.2024 rezulton se ankueses i është refuzuar aplikacioni me arsyetimin se nuk ka bashkangjitur dëshmi të mjaftueshme të punësimit.

Tutje, Divizioni i Burimeve Njerëzore në Ministrinë e Financave, Punës dhe Transfereve, më datë 30.12.2024, ka publikuar Njoftimin nga i cili rezulton se kandidati M.H me gjithsejtë 81.2 pikë të arritura është shpallur kandidatë fitues për pozitën Zyrtar Pensional për Kategoritë e Luftës.

Ankuesja, në ankesën e parashtruar në Këshill, pretendon se organi i punësimit me rastin e refuzimit të aplikacionit, nuk ka vërtetur drejtë gjendjen faktike, rrjedhimisht I ka kërkuar Këshillit, të anulohet procedura e rekrutimit deri tek akti në fjalë.

Kolegji i Këshillit, mbështetur në mandatin kushtetues dhe ligjor lidhur me sigurimin e respektimit të rregullave dhe parimeve që rregullojnë shërbimin civil, e ndërlidhur me nenin 86 paragrafi 2 të Ligjit Nr.05/L-031 për Procedurën e Përgjithshme Administrative, ku përcaktohet se: “Organi publik përcakton, në mënyrë të pavarur, llojin dhe shtrirjen e shqyrtimit administrativ, si dhe vlerëson nëse një fakt apo rrethanë është e nevojshme për zgjidhjen e çështjes”, lidhur me këtë çështje ankimore ka analizuar shpalljen e Konkursit publik me numër reference RN000015582 për pozitën Zyrtar Pensional për Kategoritë e Luftës, dhe si rrjedhojë nga analizimi i të njëjtit ka gjetur se kërkesa të përgjithshme formale në procedurën përkatëse të rekrutimit kanë qenë: Arsimimi i kërkuar: Diplomën e arsimit të lartë e nivelit të parë (Bachelor). Përvoja e punës e kërkuar: Së paku një (1) vit përvojë pune në fushën për të cilën zhvillohet procedura për plotësimin e pozitës së lirë të punës; Kërkesat Specifike: Nuk ka.

Rrjedhimisht, Kolegji me qëllim të vlerësimit të ligjshmërisë së pretendimeve ankimore të ankueses, ju referua dispozitave të Ligjit Nr.08/L-197 për Zyrtarët Publikë, përkatësisht nenit 9 paragrafi 1, ku përcaktohet se: 1. Kriteret e përgjithshme që një person duhet t'i plotësojë në procedurën e rekrutimit, për t'u pranuar si zyrtar publik në cilëndo kategori apo nivel, janë: 1.1. të jetë shtetasi Republikës së Kosovës; 1.2. të ketë zotësi të plotë veprimi, sipas legjislacionit në fuqi; 1.3. të zotërojë të paktën njërën nga gjuhët zyrtare, në pajtim me Ligjin për Gjuhët; 1.4. të jetë e/i aftë për të kryer detyrën përkatëse; 1.5. të mos jetë e/i dënuar për kryerjen e veprës penale me dashje; 1.6. të mos ketë në fuqi masë disiplinore për shkelje të rëndë në institucion publik; 1.7. të ketë arsimin, përvojën e punës profesionale dhe/apo aftësitë e kërkuara për pozitën, kategorinë, klasën apo grupin përkatës; dhe 1.8. të kaloj me sukses procedurat e pranimi të përcaktuara në këtë ligj”, si dhe nenit 6 paragrafi 2 të Rregullores (QRK) Nr.15/2023 për Procedurën e Pranimi në Shërbimin Civil, ku përcaktohet se: 2.Së bashku me aplikacionin për pjesëmarrje në procedurën e rekrutimit, kandidatët duhet të bashkëngjisnin edhe dokumentacionin në vijim: 2.1. kopjen e diplomës të kërkuar me konkurs e të dhëna nga institucionet arsimore, vërtetimin e nostrifikimit të diplomës së fituar jashtë vendit apo aktin që dëshmon se diploma e fituar jashtë vendit është në procedurë të nostrifikimit, me kusht që nostrifikimi i diplomës të dorëzohet deri në momentin e nënshkrimit të aktit për emërim në pozitë; 2.2. kopjet e dëshmisë së punësimit; 2.3. kopjet e dokumenteve që provojnë plotësimin e kushteve për aplikim të përcaktuara në shpalljen e rekrutimit dhe të deklaruara në aplikacion.

Bazuar në kuadrin përkatës ligjor, si dhe nga shqyrtimi dhe analizimi i provave të lëndës, Kolegji ka gjetur se pretendimi ankimor i ankueses për vërtetim të gabuar të gjendjes faktike është i bazuar, ngase ashtu sikurse u tha me lartë në arsyetim të këtij vendimi, sipas konkursit të shpallur me numër reference RN000015582 për pozitën Zyrtar Pensional për Kategoritë e Luftës është kërkuar që kandidatët të kenë se paku një (1) vit përvojë pune profesionale, ndërsa nga analizimi i dosjes së ankueses rezulton se e njëjta me rastin e aplikimit ka bashkangjitur Vërtetimin me Nr.Ref:1469/24 të datës 29.07.2024, mbi të cilin dokument zyrtar vërtetohet se njëjta nga data 03.04.2023 deri më datë 02.10.2023 (6 muaj), ka qenë e angazhuar për kryerjen e praktikës me pagesë tek Agjencia e Kosovës për Akreditim; Referencën e datës 06.01.2023, mbi të cilin dokument zyrtar vërtetohet se ankuesja nga data 04.07.2022 deri 04.01.2023 (6 muaj), ka qenë e angazhuar në cilësinë e praktikantes me pagesë në Departamentin e Pensioneve-Regjioni i Prishtinës, të Ministrisë së Financave Punës dhe Transfereve, rrjedhimisht mbi bazën e këtyre dëshmime vërtetohet se ankuesja plotëson kriterin e përvojës së punës, ndërsa pasi që e njëjta ka bashkangjitur edhe Diplomën me Nr.1266/17 të datës 14.09.2017, për kryerjen e studimeve themelore në programin Menaxhment dhe Informatikë në Kolegjin AAB, Kolegji i Këshillit konstaton se ankuesja plotëson të gjitha kriteret e përcaktuara si më sipër, për të vazhduar tutje në fazat e vlerësimit profesional të kandidatëve.

Kështu që, nisur nga rrethanat dhe konstatimet e dhëna si në arsyetim të këtij vendimi, në vlerësimin e Kolegjit të Këshillit, Njësia e Burimeve Njerëzore në Ministrinë e Financave, Punës dhe Transfereve, në kuptim të nenit 4 paragrafi 1 nën paragrafi 1.9 të Ligjit 08/L-197 për Zyrtarët Publik, në fazën e verifikimit paraprak, gjegjësisht me rastin e përgatitjes së listës së ngushtë të kandidatëve që nuk plotësojnë kriteret e konkursit, rrjedhimisht me rastin e refuzimit të aplikacionit të ankueses nuk ka vërtetuar në mënyrë të plotë dhe të drejtë gjendjen faktike si dhe gabimisht ka zbatuar ligjin material, ngase për pozitën e punës Zyrtar Pensional për Kategoritë e Luftës, nuk ka përfshirë në listë të ngushtë kandidatë të cilët i kanë plotësuar kriteret e konkursit, veprime këto në kundërshtim me dispozitat e Ligjit 08/L-197 për Zyrtarët Publik, përkatësisht nenin 39 paragrafi 5 dhe 6, ku përcaktohet se: 7. Konkurrimi zhvillohet në dy (2) faza: 7.1. verifikimi paraprak përmes të cilit verifikohet nëse kandidatët i plotësojnë kriteret e përgjithshme dhe ato të veçanta, sipas shpalljes së konkursit; ndërlidhur me nenin 9 paragrafi 1 nën paragrafi 1.7 të këtij Ligji.

Andaj, bazuar si më sipër, Kolegji i Këshillit me qëllim të vendosjes së ligjshmërisë, vendosi që të shfuqizoj të gjitha veprimet administrative për konkursin me numër reference RN00015582 të datës 23.10.2024, për pozitën Zyrtar Pensional për Kategoritë e Luftës, me detyrimin që në këtë rast Ministria e Financave, Punës dhe Transfereve të merr parasysh të gjeturat dhe pikëpamjet juridike sipas këtij vendimi, përkatësisht procedura sipas konkursit përkatës, duhet të vazhdojë më fazën e verifikimit të aplikacioneve për të gjithë kandidatët duke përfshirë këtu edhe ankuesen, dhe e njëjta të zhvillohet në pajtueshmëri të plotë me dispozitat ligjore.

Kështu që pas analizimit dhe vlerësimit të shkresave të lëndës si dhe duke u bazuar nenin 6 paragrafi 1, nën paragrafi 1.1, nenin 18 paragrafi 1 nën paragrafi 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, si dhe nenin 132 paragrafi 4 të Ligjit Nr.05/L-031 për Procedurën e Përgjithshme Administrative, Kolegji i Këshillit vendosi si në dispozitiv të këtij Vendimi.

Ky vendim hyn në fuqi në ditën e nënshkrimit nga Kryetarja e Kolegjit.

Këshillë juridike: Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij Vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVË

Lënda me numër: A.nr.96/2025

Atdhe GASHI

Malsore GASHI-BAJRAKTARI

Procesmbajtës

Kryetare e Kolegjit

Vendimi i dërgohet:

- Ankueses, M.G-XH;
- Udhëheqëses së Njesisë për Menaxhimin e Burimeve Njerëzore në Ministrinë e Financave, Punës dhe Transfereve;
- Arkivit të KPMSHCK-së.